



GEMEINDE/VISCHNAUNCA
DISENTIS/MUSTÉR

Cussegli da vischnaunca
5-2009/2012

Rapport da gestiun e quen 2008

M E S S A D I

dalla suprastonza communalia al cussegli da vischnaunca

Preziau signur president
Preziadas cusseglieras
Prezai cussegliers

Quest messadi cumpeglia aschibein il rapport da gestiun sco era il quen per 2008. Tenor la nova organisaziun communalia examinescha la cumissiun da gestiun omisdus rapports e rapporta surlunder alla suprastonza communalia ed al cussegli da vischnaunca. Quei proceder seresulta dalla funczion sco cumissiun predeliberonta. Iis principis per l'applicaziun da quei niev sistem ha la cumissiun da gestiun fixau ella seduta constitutiva dils 27 da schaner 2009, ch'ein silsuenter vegni sancziunai aschibein dalla cumissiun da gestiun sco dalla suprastonza communalia. En quei document ei era la relaziun denter suprastonza communalia, cumissiun da gestiun e cussegli da vischnaunca reglada.

Sco tochen dacheu procura in biro fiduziari, actualmein REVIBÜNDEN GmbH (Arne Nold ed Edgar Durschei) per la revisiun tecnica dil quen. Tenor il niev sistem ei l'examinaziun entras persunas specialisdas necessaria, sco quei ch'era igl uffeci da vischnauncas ha attestau.

Quei dat la caparra per ina controlla professiunala. Ei regia ina buna coordinaziun denter la revisiun externa e la survigilonza entras la cumissiun da gestiun.

Sin fundament dil pareri dalla revisiun externa (Management-Letter) e dallas examinaziuns supplementaras dalla cumissiun da gestiun, ein aschibein il quen sco era il rapport da gestiun vegni repassai communablamein dalla cumissiun da gestiun e dalla suprastonza communalala. Sin fundament da quella deliberaziun recamondan omisdus organs al cussegli da vischnaunca d'approbar il rapport da gestiun sco era il quen per 2008.

Rapport da gestiun

Il rapport da gestiun relata detagliadamein dalla vasta activitad dallas autoritads communalas sils differents secturs. Quei ei d'ina vart ina buna documentazion e da l'autra vart in bien instrument per s'informar tgei che cuora e passa en vischnaunca. Il cussegli da vischnaunca ha survegniu cun posta separada la versiun provisoria. Suenter la tractaziun el cussegli da vischnaunca vegn il document stampaus ella fuorma usitada. A caschun dalla deliberaziun han cusseglieras e cussegliers la pusseivladad da giavischar informaziuns supplementaras.

Situaziun finanziala

Ils davos onns ei la situaziun finanziala in tema da discussiun permanenta. Cun la votaziun communalala dils 24 da fevrer 2008 davart "in concept en favur dalla sanaziun dallas finanzas communalas e per in prospereivel avegnir dalla vischnaunca" han vischins e vischinas priu las suandontas decisiuns:

- Revisiun totala dalla lescha communalala da taglia (70% GIE).
- Alzament dil pei da taglia pigl onn 2008 sin 120% (68% GIE) ed
- alzament dalla taglia sin schischom dad 1 sin 1.7% (61% GIE).

Quels conclus ein la basa per la sanaziun dallas finanzas communalas.

Il cussegli da vischnaunca ei vegnius confruntaus cun la situaziun finanziala tier la tractaziun dil "program da lavur 2008 – 2013: visiuns – intenziuns – incaricas" (messadi 36-2006/2008) e dil plan da finanzas 2009 - 2013 (messadi 37-2006/2008) dils 14 da november 2008. La cumissiun da gestiun ei vegnida involvida da prender posiziun. Ils 28 da november 2008 ha il cussegli da vischnaunca tractau omisduas fatschentas e priu unanimamein enconuschientscha dalla nova "visiun" e dall'appreziaziun dalla situaziun finanziala sco era confirmau las prioritads proponidas dalla suprastonza communalala.

Cun l'adattaziun dil pei da taglia savein nus compensar las sperditas che seresultan dallas favurs che derivan dalla revisiun dalla lescha cantunala sco era dalla dimessa dalla taglia da cumin e dalla sistida dalla taglia per igl uorden da fiug. Ei setracta da rodund in $\frac{1}{2}$ milliun francs. Senza quellas adattaziuns havess la vischnaunca giu 10 % dameins entradas.

Igl alzament dil pei da taglia s'effectuescha pér sil quen communal digl onn 2009. Lu savein nus quintar cun entradas supplementaras da rodund frs. 180'000.--. Cun quella summa stuein nus denton compensar la dimessa dalla taglia per igl uorden da fiug e la taglia da cumin.

In quen favoreivel

Il quen annual per 2008 ei favoreivels e nus savein presentar in pign gudogn. Quei success ei d'attribuir d'ina vart ad ina buna disciplina budgetara e da l'autra vart ad in augment dallas entradas dallas taglias (persunas giuridicas, taglia sin facultad) sco era al legreivel augment dils tscheins d'aua.

Il quen current 2008 siara cun expensas da frs. 11'000'244 (onn 2007: 11'029'814, preventiv 2008: 10'832'900) ed entradas da frs. 11'065'924 (onn 2007: 10'938'118, preventiv: 10'243'800). Quei resultat munta ad in surpli d'entradas da frs. 65'680 (onn

2007: -91'696, preventiv: -589'100), quei suenter haver amortisau il deficit da bilanza cun frs. 101'000. Las amortisaziuns totalas muntan a frs. 1'674'171 (onn 2007: 1'685'949, preventiv: 1'549'300).

Il quen d'investiziun siara cun expensas da frs. 851'360 (onn 2007: 1'476'158, preventiv: 1'189'800) ed entradas da frs. 588'759 (onn 2007: 1'043'364, preventiv: 533'000) pia investiziuns nettas da frs. 262'601 (onn 2007: 432'794, preventiv: 656'800).

Il quen current ei per rodund frs. 650'000 pli favoreivels che previu. In grond svari sedat ei era tier las investiziuns. Ellas ein rodund in quart milliun francs pli bassas che calculadas. Quei deriva da differents facturs. D'ina vart corrispunda la reducziun alla voluntad da spargnar e da l'autra vart all'arrivada prematura digl unviern. Ils davos treis onns ein las investiziuns sereducidas canticadamein. Il grad dall'atgna finanziaziun ei s'augmentaus a 663% (368%). A liunga vesta ei la reducziun dallas investiziuns da donn per l'activitat economica e per la purschida da buns survetschs.

Commentari d'entginas posiziuns

Tier las suandontas posiziuns eis ei sedau differenzas, che meretan da vegnir dilucidadas:

O Administraziun generala

Legreivlamein ein las expensas nettas sereducidas visavi il preventiv per rodund frs. 36'000. Ei vegn adina puspei tschercau pusseivladads d'optimar l'administraziun. En favur dalla transparenza ein las entradas ed expensas digl uffeci civil Sursassiala vegni cudaschi sut la sparta 022. Ils cuosts da paga sco era las taxas dall'administraziun communalia ein cheutras sereduvi corrispudentamein.

Ils uffecis civils dalla Cadi ein vegni fusiunai cun l'entschatta 2009 el niev uffeci civil dalla Cadi. Quella posiziun figurescha perquei per la davosa gada el quen communal.

100 Uffeci funsil

Il quen digl uffeci funsil figurescha buca pli el quen communal (cf. commentari el rapport da gestiun).

140 - Basa da pumpiers e polizia da fiug

Quella sparta ei vegnida menada sco finanziaziun speciala. En vesta alla nova corporaziun "Pumpiers Sursassiala" e sin recumandaziun digl uffeci da vischancia ei quella finanziaziun speciala vegnida sligiada cun la fin 2008. Ord il conto d'ulivaziun ei perquei vegniu secret dabien al quen current la summa da frs. 9'975.80 (cto. 140.480.00).

2 Scolaziun e formaziun

Il resultat ei per rodund frs. 120'000 pli favoreivels che previu. Quei ei d'attribuir a differents facturs sco era agl augment dallas contribuziuns pils scolars d'ordeifer, mo era allas stentas d'optimar il plan d'instrucziun e da lecziuns.

340 - Center da sport e cultura

Il CSC siara cun in surpli d'expensas da frs. 58'325. A vesta che varga frs. 50'000 per investiziuns (localitads quartier militar e da gruppas) ein vegni engreviai al quen da menaschi e che la restituziun d'energia e la contribuziun da SMT ein vegnidas abolidas (total ca. frs. 43'000), ei quei in bien resultat.

4 Sanadad

400 e 440 - La contribuziun al deficit dil Spital regiunal Surselva ei en cumparegliaziun cul

quen 2007 sereducida per rodund frs. 13'500. Da l'autra vart ein las reservas per las contribuziuns a Spitex Cadi consumadas, aschia che la contribuziun da frs. 20'861 figurescha cumpleinamein el quen.

410 - Entras ina cunvegnientscha cun las casas da tgira ei la vischnaunca obligada da pagar ina contribuziun da frs. 10 (2008) per cussadent e di ch'ina persuna passenta en casa da tgira. Quella disposiziun sebasa sil niev sistem cantunal per finanziar ils cuosts da renovaziuns e d'engrondaziuns dils edifecis. Quei importo da frs. 121'560 era buca budgetaus, aschia ch'el ei per la mesedad vegnius finanziaus cun agid dil fondo Casa Sogn Gions (cto. 289.09).

5 Ovras socialas

Las expensas nettas per ovras socialas ein en cumparegliazion cugl onn 2007 sereducidas per bunamein frs. 90'000. Legreivlamein ein era las sperditas da premias, vul dir las premias da cassas da malsauns ch'ils assicurai san buca sezs finanziar, sesminuidas per varga la mesedad. Entras la crisa da finanzas e las schliatas perspectivas economicas eis ei denton da quintar cun in carschament da quella posizion.

710 - Canalisaziun e serenera

Era suenter haver risguardau las taxas da colligazion siara quella finanziazion speciala cun in surpli d'expensas da rodund frs. 190'000. Cheutras s'aumenta il manco el conto d'ulivaziun ella bilanza 181.01 (deivet dalla finanziazion speciala enviers il quen communal) a rodund frs. 460'000. Aschinavon ch'ei sa buca vegnir incassau dapli taxas da colligazion, ston las taxas da diever vegnir adattadas. Ils revisurs e la cumissiun da gestiun han repetidamein fatg attents sin quei fatg, ch'ei era enconuschents alla suprastanza communal. Nus prevedin da tractar quella problematica el rom dil niev plan da finanzas.

Contribuziun alla Corporaziun d'aua Clavaniev

Per promover l'integrazion dalla Corporaziun d'aua Clavaniev ella Corporaziun d'aua Spina da vin ha la suprastanza communal concediu ina contribuziun da frs. 20'000. Quella ei vegnida cudischada el quen current *cto. 700.362.00 - Contribuziuns a corporaziuns d'aua*.

812 - Raccolta da lenna

La suprastanza communal ha decidiu da metter a disposiziun la lenna per baghegiar la stalla claustral a Salaplauna ord ils uauls dalla vischnaunca. Rodund la mesedad dalla valeta

(frs. 15'000) ei vegnida scetta dabien al conto *812.435.00 – Lenna da condotta ed engreviada al conto 840.318.00 - Promoziun dall'economia*.

Sin recumandaziun dils revisurs externs havein nus preparau ina survesta danunder ch'ils mieds finanzials derivan e co els vegnan impundi (Mittelflussrechnung). Quella vegn aschuntada al messadi.

Fundaziun Casa da tgira Sursassiala

Il menaschi dalla Casa Sogn Gions ei tenor decisiu dil cussegl da vischnaunca dils 16 da schaner 2006 respectivamein dils 16 da november 2007 vegnius integraus cumpleinamein el menaschi dalla Fundaziun Casa da tgira Sursassiala. Aschibein il regulativ da taxas per la Casa Sogn Gions sco era la cunvegnientscha digl onn 1994 denter la vischnaunca e la Fundaziun Casa da tgira ein vegni cassai. Consequentamein cumpeta la revisiun e l'approbaziun dil rapport da gestiun e da quen al cussegl da fundaziun e buca pli alla vischnaunca respectivamein al cussegl da vischnaunca. Tuttina suttamettein nus il quen al cussegl da vischnaunca; quei denton mo per informaziun.

Il rapport da gestiun dat detagliadamein sclariment sur dil curriu e passau sin quei sectur.

Directivas da cudischaziun

El messadi digl onn vargau (25-2006/2008) dils 18 da mars 2008 havein nus dilucidau las damondas da cudischaziun. Il cussegl da vischnaunca ha approbau ils 11 d'avrel 2008 las directivas che nus applichein ussa. Il regulativ communal pil menaschi finanzial ei vegnius cassaus ils 23 da fevrer 2007 e nus sebasein directamein sin la lescha davart las finanzas dil cantun e l'ordinaziun concernenta. Quellas ein d'applicar conform al senn. Differentas prescripziuns san denton buca vegnir surpridas per las vischnauncas.

Consideraziuns finalas

L'approbaziun dil concept per la sanaziun dallas finanzas ei ina buna basa per direger il menaschi communal. Las autoritads ein pertschartas ch'ei drova denton aunc grondas stentas, d'ina vart per spargnar expensas e da l'autra vart per recaltgar novas entradas. Cun il niev program d'activitatad sperein nus da contonscher quellas finamiras.


Propostas

En concordanza cun la cumissiun da gestiun

p r o p o n a

la suprastanza communal da cunsello da vischnaunca

1. d'approbar il rapport da gestiun 2008;
2. d'approbar il quen 2008;
3. da suttametter il quen 2008 al referendum facultativ conform agl art. 21, lit. a dalla constituziun communal.

Il president:


Dr. Dumeni Columberg

Suprastanza communal da Disentis/Mustér

Il canzlist:



Andri Hendry

Disentis/Mustér, ils 14 d'avrel 2009

Gia retschiert cun posta separada:

- rapport da gestiun 2008 (incl. part forestalessere separada)
- survesta dil quen 2008
- quen current e quen d'investiziun 2008
- bilanza pilis 31-12-2008
- quen 2008 e bilanza dil Center da sport e cultura
- resumaziun dil quen 2008 e della bilanza della Casa da tgira Sursassiala

Annexa:

- quen dalla circulaziun dils mieds finanzials (Mittelflussrechnung)